

六藝之一錄

欽定四庫全書

六藝之一錄卷一百六十一

錢唐倪濤撰

法帖論述三十一

黃庭經

黃庭經一篇晉永和
中刻石世傳王羲之書書雖可喜
而筆法非羲之所為黃庭經者魏晉時道士養生之書
也今道藏別有三十六章者名曰內景而謂此一篇為
外景又分為上中下三部者皆非也蓋內景者乃此一

金定四八二
卷一百六十一
篇之義疏爾流俗又有一篇名曰中景者尤為繁雜鄙俚之所傳也余嘗患世人不識其真多以內景三十六章為本經因取永和刻石一篇為之注解余非學異說者哀世人之惑於謬妄爾

黃庭別本續得之京師書肆不知此石刻在何處其字畫頗類顏魯公甚可愛而不完更俟求訪以足治平丁未閏月三日書

黃庭經二篇皆不著書人名姓余初得後本已愛其字

不俗遂錄之既而又得前本於殿中丞裴造造博古君子也自言家藏此本數世矣與其藏于家不若附見余之集錄可以傳之不朽也余因以舊本較其優劣而並存之使覽者得以自擇焉世傳王羲之嘗寫黃庭經此豈其遺法歟

右歐陽文忠集古錄

黃素黃庭經一卷是六朝人書陶穀跋云山陰道士劉君以羣鵝獻右軍乞書黃庭經此是也晉史載為寫道

德經當舉羣鵝相贈因李白詩送賀監云鏡湖流水春
始波狂客歸舟逸興多山陰道士如相見應寫黃庭換
白鵝世人遂以黃庭經為換鵝經甚可笑也此名因開
元後世傳黃庭經多惡札皆是偽作唐人以畫贖猶為
非真則黃庭內多鍾法者猶是好事者為之耳

右米芾書史

黃素黃庭經字札古無楮薛體殆六朝人所作縫有鍾
紹京印後有陶穀漢時跋云此換鵝經也甲戌九月十

一日百計取得此書詳觀誠無唐盛時體是銛鋒筆行書
雖恐非右軍誠爾界行有鍾紹京書印二字小印卷末
真寫胎僊二字用陳氏圖書印印之又有錢氏忠孝之
家印紙跋云山陰道士劉君以羣鵝獻右軍乞書黃庭
經此是也逸少真書此經與樂毅論太史箴告誓文累
表也蘭亭洛神賦皆行書其他竝草書也草十行敵行
書一字行書十行敵真書一字耳又續題云此乃明州
刺史李振景福中罷任過浚郊遺光祿朱卿朱卿名友

文即梁祖之子後封博王王薨予獲於舊邸時貞明庚辰秋也晉都梁苑因重背之中書舍人陶穀記是日降麻以京兆安彥威兼副都統米某跋云印小字乃唐越公鍾紹京印也此書在李太師第固是甲觀

右寶章待訪錄

黃庭經王氏父子書皆不可復見小字殘缺者云是永禪師書既利缺亦難辨真贋字差大者是吳通微書字形差長而瘦勁筆圈勝是徐浩書也

跋程公異所藏石刻

右山谷題跋

晉黃庭經凡三本無書人名氏前二本大約相類題云
永和十二年山陰縣寫後一本其後不完不知石所在

右歐陽棐集古錄目

世疑黃庭經非羲之書以傳攷之知嘗書道德經不言
寫黃庭也李白謂黃庭換鵝其說誤矣然羲之自寫黃
庭授子敬不為道士書此陶貞白曰逸少有名之蹟不
過數首黃庭為第一貞白論書最精不應謬誤今世所

傳石本筆畫反不逮逸少他書觀開元中陸元悌奉詔
檢校言右軍真行惟有黃庭告誓知非楷字矣天寶末
又為張通儒盜去莫知所在迺知舊書不傳今所見者特
後世重搨疊模不得其真久矣蜀本黃庭經筆墨麤工
本皆非可貴第以其名存之

淇水呂先得黃庭經最為異者見使評之余謂今世所
傳黃庭經多唐臨黃庭之亡久矣後人安所取法以傳
耶張懷瓘謂逸少佳蹟自永和後而黃庭經永和十二

年書也字勢不聯翩而點畫多失雖摹搨相授有失其
初若無勝概可存縱傳授有據亦何取哉呂先得石書
署其年永嘉支離其字尤不近古其永字等頗效王氏

變法皆永嘉所未有余是以知其非也

別本黃庭經

夫求馬者必自其羣至授以騏驥之任則真馬出矣唐
得漢魏晉隋間書多至七百卷於是以黃庭為第一方
在衆書時豈無所異而可一概哉顧世未嘗衡校而彈
繩之則論有同異不足怪也至稽之法度而脗合窠之

體裁而結密索之神明而不竭者於是世知有驛駟矣
此當時唐人得舊本摹入石者時見筆意與常見二本
及今秘閣所存異甚知唐初選置能盡書矣

右廣川書跋

黃庭世有數本皆刊缺不全獨此本字畫具存乃慶歷
中摹者然氣象猶在不可以近而忽之也

黃庭世有數本或響搨或刊刻皆正書蓋六朝及唐人
轉相模倣所以不同此卷臨學殊工字勢原倣歐率更

固自合作殊可嘉歎世傳黃庭真帖為逸少書僕嘗攷之非也按陶隱居真誥翼真檢論上清真經始末云晉哀帝興寧二年南嶽魏夫人所授弟子司徒公府長史楊君使作隸字寫出以傳護軍長史許君及子上計掾掾以付子黃民民以傳孔默後為王興先竊寫之始濟浙江遇風飄沒以真誥校惟黃庭一篇存蓋此經也僕按甲子歲逸少以晉穆帝昇平五年卒是年歲在辛酉後二年即哀帝興寧二年始降黃庭于世安得逸少預

書之又按梁虞蘇論書表云山陰曇礪村養鵝道士謂
羲之曰久欲寫河上公老子繡素早辦而無人能書府
君若能自屈書道德經兩章便合羣以奉於是羲之便
停半日為寫畢攜鵝去而晉書本傳亦著道士云為寫
道德經當舉羣相贈耳初未嘗言寫黃庭也以二書攷
之即黃庭非逸少書無疑然陶隱居與梁武帝啓云逸
少有名之蹟不過數首黃庭勸進告誓等不審猶有存
否蓋此啓在書真誥前故未之考證耳至唐張懷瓘作

書估云樂毅黃庭但得幾篇即為國寶遂誤以為逸少
書李太白承之作詩山陰道士如相見應寫黃庭換白
鵝苟欲隨之耳初未嘗攷之而韓退之第云數紙尚可
博白鵝而不云黃庭豈非覺其謬歟然今此帖始見于
梁代蓋晉興寧已後或宋齊人書也僕頃在洛見承直
郎李鵬舉家畜此帖一卷乃唐褚令摹單郭未填筆勢
精善乃錢思公家本號玉軸黃庭中有五行為周越摹
換之今歸御府矣世所傳本無出其右今題此卷聊爾

論之

右黃伯思東觀餘論

黃庭經為王氏父子所書者皆不可復見宋儒評其小字殘缺者蓋是永禪師書字差大者是吳通微書差長而瘦勁則徐浩筆耳此帖揭秘監稱其溫潤可喜當是世之善本不知果出永禪師筆耶抑通微之與浩也東坡山谷輩復生當必能辨之矣

九靈先生金華戴良叔能跋

黃庭經刻本出于泰州者傷於骨勝出于越州者病於

肉多此本乃北方古刻肥瘦適均而神意俱全信為佳
本海內絕無而僅有者也

王禕子
克跋

右格古要論

陶隱居與梁武論書表云右軍名蹟合有數首黃庭經
曹娥樂毅論是也當時臨榻偽寫已多况今日乎此刻
尤有筆意真可寶也倪瓚

右停雲館帖

伯思之論似若詳悉矣以予考之其說非也蓋書黃庭

經換鵝與書道德經換鵝自是兩事伯思語黃庭之傳
在右軍死後二年此最失於詳審也道家有黃庭內景
經文黃庭外景經及黃庭遁甲緣身經黃庭玉軸經世
俗例稱為黃庭經內景經乃大道玉晨君所作扶桑大
帝君命賜各神王傳魏夫人凡三十六章即真誥所言
者外景經三篇乃老君所作即右軍所書者與魏夫人
所傳者初不同予家舊藏右軍所書外景經石刻一卷
凡六十行末云永和十三年五月二十五日在山陰縣

寫與小歐陽集古錄目校之與文忠所藏本同則右軍之寫黃庭甚曉然緣諸公考之未詳故未免紛紜如此黃伯思謂與梁武啟在著真誥之前此又曲為之辨也予又嘗于道藏中得務成子注外景經一卷有序云晉有道士好黃庭之術意專書寫嘗求序人聞王右軍精於草隸而復愛白鶴遂以數頭贈之得其妙翰右軍逸興自縱未免脫漏但美其書耳張君房所進雲笈七籤亦載此序此最為的據也蓋道德經是偶悅道士之鶴

因為之寫若黃庭是道士聞其善書且喜鵝故以是為
贈以求其書此是兩事頗分明緣俱以寫經得鵝遂使
後人指為一事而妄起異論唯李太白知其為二事故
其書右軍一篇云右軍本清真蕭灑出風塵山陰過羽
客要此好鵝賓埽素寫道經筆精妙入神書罷籠鵝去
何曾別主人此言書道德經得鵝也送賀賓客歸越一
篇云鏡湖清水漾清波狂客歸舟逸興多山陰道士如
相見應寫黃庭換白鵝此言書黃庭經得鵝也太白於

兩詩亦各言之都未嘗誤乃後人自誤也又程文簡演
繁露云王羲之本傳以書換鵝者道德經也文士用作
黃庭人皆以為誤張彥遠法書錄載褚遂良右軍書目
第二卷有黃庭六十行正書與山陰道士其時真蹟故
在既可以見其為黃庭無疑又武平一徐氏法書記親
在禁中見武后曝太宗時法書六十餘函所記憶者扇
書樂毅告誓黃庭又徐浩古蹟記玄宗時大王正書卷
以黃庭為第一不聞道德經則傳之所云却誤程云晉

書傳誤者蓋未詳太白之詩故不知為二事也

右王氏法書苑

黃長睿以陶隱居翼真檢興寧二年南嶽魏夫人授弟子楊君黃庭經使作隸字寫傳許長史時右軍歿已二歲為辨然隱居上梁武書云逸少有名之跡黃庭勸進不審猶得存否長睿以隱居破隱居亦似癡人說夢也第唐人謂是換鵝經則可笑耳此木本宋搨摹拓展轉失真而中間尚存意態如所謂王謝家子弟猶可想也

昔人謂右軍黃庭不傳世而傳者乃吳通微書余所見
多文氏停雲館本往往纖促無復遺蘊以為真通微贗
作及觀此宋搨乃木本耳而增損鍾筆圓勁古雅小法
楷法種種精妙乃知停雲自是文氏家書耳且通微院
吏體安能辦此狡獪耶曹君其寶之異日受白雲子訣
見飛天仙人鸞鶴時更當一大快也

右弇州山人藁

黃庭內景經舊黃素書或以為右軍跡非也晉書言右

軍寫五千言遺山陰道士則黃庭尚在可疑况因黃庭
又及內景經乎唐人臨仿率用黃素據此以證是滿世
界皆右軍矣董元宰欲援陶秀實趙吳興二跋定為楊
羲和書亦屬臆決予觀宣和書譜明載梁元一寫太上
內景經見藏御府且言元一效鍾王楷法其法嚴其氣
逸其格清嚴如秉簡而立仙壇逸如馭風而揮八極清
如秋霄之飲沆瀣推許良亦不薄今遺蹟大約近之何
必如骨董家盡歸之右軍以眩聾瞽耶

右都穆金薤琳瑯

黃庭經以師古齋刻為第一乃褚遂良所臨也淳熙續法帖亦有之

黃庭經稍近鍾體與樂毅論東方像贊小異宋時所刻是吳通微摹本又經王著臨手已非右軍本色唯米元章書史所載褚河南綠綾臨本致佳耳

黃庭外景經真蹟此卷未見據友人云與內景經同一綃素同一筆法又有云是宋高宗臨者在吳江吳憲副

家

右書畫眼

潁上本又名井底碑

此帖右軍真蹟不傳惟虞永興褚潭州歐陽率更臨本盛傳傳而寢遠寢譌如真賞齋停雲館不足觀此刻久塵潁上學宮相傳學址舊在城南外關因民間掘井得石洗而視之迺出此焉然潁人眇鏡古者歲月澶漫不可考余索而諦識風神遒緊大近褚筆蓋

唐文皇以館閣摹本散置黌塾間疑是其一云龔邱
張登雲跋

潁上井上有光得一石鐵皮錮束之啟視乃右軍黃庭
經董元宰嘗以搨者示余頗異恒刻今聞藏潁上庫中
右書畫史

藝苑雌黃云老杜房公池鵞詩鳳凰池上應回首為報
籠隨王右軍山谷題劉將軍畫鵞詩還似山陰書罷舉
羣驅向王家而前輩詩又有鵞費羲之墨書罷籠鵞去

數紙尚可博白鷺山陰不見換鷺經白鷺曾換右軍書
皆不斥言所書者何經西清詩話載李太白詩山陰道
士如相訪為寫黃庭換白鷺考之晉史逸少所寫乃道
德經非黃庭也太白蓋誤用此事比觀梅聖俞謝元憲
宋公贈鷺詩昔居鳳池上曾食鳳池萍乞與江湖去從
教養素翎不同王逸少辛苦寫黃庭聖俞此語豈亦承
太白之誤歟又觀白氏六帖所載則古人誤用此事非
獨太白為然也苔溪漁隱曰呂居仁寄朱希真詩云主

人鷺可換更為寫黃庭亦沿襲誤用也余謂李太白又有詩云掃素寫道經筆精妙入神書罷籠鷺去何曾別主人則又謂道德經矣

右宋胡仔漁隱叢話

宋秘府黃庭經

戴良叔能跋見前

宋諸名賢論黃庭衆矣然但辨其非換鷺物卒未嘗定為何人書雖米南宮亦第云並無唐人氣格而已至黃長睿秘書始以逸少卒於昇平五年後三年為

興寧二年黃庭始出不應逸少先以書之意宋齊人書然不可考矣予按陶隱居與梁武帝啟已有逸少名蹟黃庭勸進等語隱居去晉為近當時已悞有此書則此書雖非逸少筆其為晉宋間名人書無疑而趙魏公以為楊許舊蹟豈別有所見乎唐石刻數種並佳傳流近代轉亦失真無足觀者此本紙墨刻搨皆近古有宣和紹興印章想曾入秘府且陶學士跋語甚詳字比諸刻瘦勁涪翁所謂徐浩摹本為是都

元敬不知何緣得之以遺從闕慶雲今轉以付余亦
楷法中第一等帖自可寶也癸卯上巳日徵明記

西麓堂鸞羣帖

右黃庭西山初榻也當西山完刻時以黃紙印數十
本而京兆沒其刻遂流落於星源潘氏又數十年為
草闕孫氏再傳方入吾家今以家刻與此本較之雖
先民矩矱具存而字畫之間不無肥瘦具眼者自能
辨之青嵐道人識

右珊瑚網

樂毅論

樂毅論者正書第一梁世摹出天下珍之自蕭阮之流
莫不臨學陳天嘉中人得以獻文帝帝賜始興王王作
牧禁中即以見示吾昔聞其妙今覩其真閱翫良久匪
朝伊夕始興薨後仍屬廢帝廢帝既沒又屬餘杭公主
以前王所重恒加寶愛陳氏諸王皆求不得及天下一
統四海同文永處處追尋累載方得此書留意運工特盡

神妙其間書誤兩字不欲點除遂雌黃治定然後用筆
陶貞白云大雅吟樂毅論太史箴等筆力妍媚紙墨精
新斯言得之矣釋智永記

右法書要錄

貞觀十三年四月十九日奉勅內出樂毅論是王右軍
真蹟令將仕郎直弘文館馮承素摹寫賜司空趙國公
長孫無忌開府儀同三司尚書左僕射梁國公房玄齡
特進尚書左僕射申國公高士廉吏部尚書陳國公侯

君集特進鄭國公魏徵侍中護軍安德郡開國公楊師
道等六人於是在外乃有六本並筆勢精妙備盡楷則
褚遂良記

右墨池編

王羲之書舊傳樂毅論乃羲之親書於石其他皆紙素
所傳至唐太宗哀集二王墨蹟惟樂毅論石本其後隨
太宗入昭陵朱梁時耀州節度使溫韜發昭陵得之復
傳人間或曰公主以偽本易之元不曾入壙本朝入高

紳學士家皇祐中紳之子高安世為錢塘主簿樂毅論
在其家予嘗見之時石已破缺末後獨有一海字者是
也其家後十餘年安世在蘇州石已破為數片以鐵束
之後安世死石不知所在或云蘇州一富家得之亦不
復見今傳樂毅論皆摹本也

右夢溪筆談

晉樂毅論石在故高紳學士家紳死家人初不知惜好
事者往往就閱或摹傳其本其家遂秘藏之漸為難得

後其子弟以其石質錢于富人而富人家失火遂焚其石今無復有本矣益為可惜也後有甚妙二字吾亡友聖俞書也論與文選所載時時不同考其文理此本為是惜其不完也

右集古錄

高紳為湖北轉運使道中聞砧聲清遠因得此本於其覆而已斷裂矣遂載以歸完理緝綴積以木箱所可辨者如此後世之傳布皆止于海字則其碎而不緝者良

可惜也

右姑溪題跋

樂毅論舊本舊藏高紳學士家集古錄云火焚其石者非也元祐間余侍親官徐州時故郎官趙竦被旨開呂梁洪挈此石隨行已斷裂用木為匣貯之竦尤珍惜親友有求墨本者必手模以遺之竦沒今遂不知所在

右金石錄

余嘗戲為人評書云小字莫作癡凍蠅樂毅論勝遺教

經大字無過瘞鶴銘隨人作計終後人自成一家始逼
真然適作小楷亦不能擺脫規矩客曰子何捨己之凍
蠅而謂人凍蠅子無以應之固知書雖棊鞠等技非得
不傳之妙未易工也

右山谷題跋

沈存中謂樂毅論是右軍手書刻石唐文皇將以殉葬
者此殆似夢中語按此論是右軍手書以貽子敬者至
梁武已疑其為摹迹而陳文帝賜始興王至貞觀中進

御十三年命起居郎褚遂良排署至中宗朝太平公主
攜出以錦袋裝之後變起咸陽老嫗竊得為吏所迹迫
而投之爨下宋有二石本其一秘閣所刻其一高紳學
士家所藏蓋它摹本之壽諸石者也

舊石刻斷軼其半者字瘦勁無俗氣後有人復刻此斷
石文摹傳失真者多矣完書者翰林侍書王著寫用筆
圓熟亦不易得如富貴人家子弟非無福氣但病在韻
耳

右山谷集

樂毅論世無全文高紳所藏石至海字止以史記校之
四纔得其一爾今世所傳又其摹于此者蓋無取也觀
梁武帝評書謂此論微麤健恐非真蹟陶弘景亦疑摹
本梁去東晉六十年其書不存况今去梁後又數百歲
中間馮承素已見六本今世所傳亦莫能辨先天中太
平敗後咸陽老嫗投書竈下是弘景所評已亡矣後世
存者可求其真耶

李庠舊得樂毅論其本乃高紳所藏石過自矜持謂真
逸少書沈存中亦謂得前人說逸少諸書多是繡紙惟
樂毅論書于石世以此為据余竊疑其不知何以得此
說也昔梁武帝搜采逸少至盡而樂毅論已出當時無
石本傳者大抵逸少每為人書多以前人賦論見於世
傳之存者如黃庭畫贊洛神賦皆書于紙以授雖脩禊
序亦不令入石也唐得晉魏諸家字書故嘗評黃庭第
一畫贊次之樂毅論又其次也武平一曰太宗於右軍

書特留賞蘭亭樂毅論尤聞寶重別一小函貯之太平
公主私取樂毅論以歸及籍其藏咸陽姬竊舉袖中投
之竈下開元錄書但有黃庭畫贊告誓而樂毅論亡矣
舊傳樂毅論誤書兩字以雌黃點正以今所傳校於舊
史異者蓋二十八字其文意自不相妨蓋書傳已久不
能無誤昔時於秦玠兵部家得別本樂毅論文字完整
筆力差劣然校今秘閣石本亦可上下相敵或疑王著
之所書也

智永師謂樂毅論正書第一自梁世摹出其後蕭銑之
流莫不臨學然則此論不傳于世矣陳文帝嘗賜始興
王雖號筆力鮮媚殆其臨搨之功勝也秘閣購書則其
論全文陶弘景言樂毅論乃極勁利而非用意處故頗
有壞字今所得異矣元符中詔摹于石以其書校之殆
唐人所書不逮舊本然聖俞悉之謂最竒小字者是也
昔王沂公善書嘗求得全文乃自石未破時摹尤為精
勁余從其家得之非今秘閣石可比方也

全本樂
毅論

右廣川書跋

樂毅論石刻有二本其一元豐初吳人得其石於太湖水中石缺過半背面皆有刻面十三行背六行後題永和四年十一月二十四日書賜官奴其上書异僧權即梁人朱异徐僧權也又有草書兩行云知足下行至吳念遠離不可居叔當西爾今十七帖中亦有此一帖然不可居三字亦已缺不全後有小字一行云太和二年中勅畢太和唐文宗年號疑若唐玄度兄弟所摹蓋其

字勢甚類玄度書故也其一即周越法書苑所記高紳
學士得其石于秣陵井中者是也

凡二十九行

石缺一角後

兩行只有最下一字至海字止紳之子安世死於吳其
家以石質錢因沒入州民錢氏石已破為數片以鐵束
之當官者每令摹拓錢氏厭之給言比失火焚毀矣熙
寧中吳大饑疫吾姻家趙子立以黃金買得之子立每
欲摹本必躬濡紙傳石以綿帛漬墨拓之自此雖權勢
皆不可得向之傳于人者益寶之矣或以為舊傳樂毅

論乃右軍親書于石其後石入昭陵朱梁時溫韜得之
復傳人間即高氏本是也又按張彥遠法書要錄記智
永云樂毅論者正書第一梁世摹出天下珍之蕭阮之
徒莫不臨學又褚遂良記貞觀十二年内出樂毅論是
王右軍真蹟今直弘文館馮承素摹寫賜長孫無忌等
六人于是在外乃有六本並筆精妙備盡楷則又書譜
云太平公主愛樂毅論則天與之以織成錦袋盛之主
敗籍沒咸陽姬竊舉袖中更覺姬投之竈中不可復得

而攷此數者之說未審孰是而子立所得高氏本字勢
奇絕非右軍親書于石亦摹其蹟而刻之者然石已破
裂而字蹟稍存得者宜寶藏之

徐平甫

樂毅論淳熙癸卯歲徐仁叔持以見遺云此即周越法
書苑所記高紳學士得於秣陵井中者也紳之子安世
死于吳其家以石質錢沒入州民錢氏失火石焚裂為
數片雖未甚損缺素厭州縣索取因給以不存熙寧間
吳中饑始出碎石求售趙子立捐黃金數十兩得之鐵

掬匣藏躬自濡紙以綿帛漬墨浥取所傳于人蓋寡子
立死以授徐平甫徐氏二世秘藏不以語人雖極加愛
護亦日就剝落今則石面盡脫初見若不復有字側目
細視僅存髣髴拓取稍不謹石屑隨紙而起想不復能
傳遠矣子立名竦泉南人曾漕兩浙為都水使者二女
無子徐平甫諱康直實子立長壻仁叔名壽卿平甫孫
也因以其說考之歐陽公集古錄云高紳死其子弟以
石質錢于富人富人失火遂焚其石今無復有本矣趙

德甫金石錄云集古云非也元祐間予侍親官徐州時
故郎官趙竦被旨開呂梁洪挈此石隨行已斷裂用木
匣貯之竦甚珍惜親舊有求墨本者必手摹以遺之竦
沒今遂不知所在蓋歐公為質錢所給而趙德甫不知
後歸徐氏也按褚遂良右軍書目樂毅論四十四行而
高紳舊本存二十九行又缺一角損者九行而最後二
行止有一字至海字止字之全者三百五十七今伯仁
所摹可見者一百八十九字又內二十二字不全竦瘦

僅存字骨不復見運筆勢矣予先得舊本校歐陽氏所
藏文忠公本分毫不爽今又得此遂附其後可以見物
之變遷雖金石之堅亦就泯滅也

臨川王厚之

右寶刻叢編

新安朱熹觀王順伯所藏樂毅論黃庭經東方贊皆昔
所未見撫歎久之

沈存中筆談云皇祐中嘗于高紳之子錢塘主簿安世
家見此石後十餘年安世在蘇州石已破為數片以鐵

東之後安世死石不知所在或云蘇州一富家得之亦
不復見存之所記與歐陽公不同如此延之所謂錫山
徐氏者豈又得之蘇州富家耶延之又謂損泐模糊則
石雖幸存亦無復如此本之清勁矣續閣帖中所刻全
文又不知所自來頃年曾于折子明家見其所藏舊本
筆意絕類徐季海要皆非此本之比也

右晦菴題跋

樂毅論縱橫馳騁不似小字瘞鶴銘法度森嚴不似大

金定四庫全書
卷一百六十一
字此後世作者所以不可仰望也

世傳中山古本蘭亭湍流帶右天五字有殘闕處於是
士大夫所藏蘭亭悉然又謂樂毅論古本至一海字止
于是凡樂毅論亦至海字而亡其餘妄偽亂真大抵如
此今伯予此軸皆佳後一本尤敷腴可愛未可以海字
為定論也嘉定戊辰歲七月己未山陰陸某務觀書時
年八十有四

右放翁題跋

世傳二王帖皆以真蹟摹勒獨樂毅論就書丹其石在
高紳學士家已殘缺至海宇止後轉屬趙立之處今重
摹者後猶有趙立之印予淳熙庚子自嶺右回至宜春
見元本于一士家用北紙北墨無一殘缺而清勁道媚
正類蘭亭字形比今世所重摹者幾小一倍此蓋齊梁
間拓本真人間希世之寶

右

闕

外景樂毅俱有完本不完本完本則爛若舒錦不完本

則零若遺珠三復之餘覺不完者差勝二書見駁通人
幾成子朝之誣至有以為吳通微及王著筆者此中尚
可容虞褚數人不知通微輩能辨之否

右
闕

樂毅論世傳為羲之正書第一此閣老宜興公所藏其
前有褚氏小印後云貞觀六年十一月十五日中書令
河南郡開國公臣褚遂良奉勅審定及排類上復有紹
興并米芾賈似道諸印張宣公敬夫跋謂細觀行筆知

為真蹟無疑按徐浩古蹟記云貞觀十三年十二月太宗以二王書裝成部帙命起居臣褚遂良排署則云貞觀六年者非也徐氏又云太平公主愛樂毅論以織成錦袋盛之及沒竊于咸陽老嫗縣吏捕嫗嫗驚投之爨下書述記云長安神龍之際太平公主奏借樂毅論出外搨寫遂失所在其說與徐氏合則真蹟在唐已不存矣然余又嘗見僧智永題樂毅論謂自梁世摹出天下珍之他日遂良記搨本樂毅論貞觀十二年四月九日

金定四庫全書
卷一百六十一
內出樂毅論真蹟命直弘文館馮承素摹賜長孫無忌
等于是人間始有其本觀二說則樂毅論之傳世皆後
人所摹而此特其一歟宣公道學君子賞鑒恐非所長
或題語出其一時而不暇詳考亦未可知也都穆跋

右寓意編

樂毅論後人以為右軍自書刻石梁世所摹與唐摹字
形各異淳熙秘閣續梁摹本也余家鴻堂帖唐摹本也
又有一本亦唐摹在長安李氏曾屬余跋亦文壽承跋

蓋貞觀中太宗命褚遂良等摹六本賜魏徵諸臣此六本自唐至今余猶及見其二

梁摹本白麻紙真蹟為新都吳生所有余亦不甚臨樂毅論每以大令十三行洛神賦為宗極耳

右董其昌書畫眼

梁摹樂毅論真蹟

余所見樂毅論宋搨本及唐貞觀摹真蹟二本皆無付官奴三字獨此有之初甚完好聞吳氏購時主人故漫

之殊可惋惜智永跋所云梁世摹出天下珍之即此帖
是余定為梁摹以俟知者董其昌觀并題

唐人雙鉤稱為絕詣余往亦嘗見鍾太傅薦季直表與
右軍快雪時晴諸帖時不免有滯膩氣獨此樂毅論筆
勢流麗神彩煥發無異書者非工書家又非不問歲月
必逼古人安能為此即使右軍復生當為撫掌矣毘陵

唐鶴徵

余生平好古所見法書頗多海內所藏真楷惟韓宗伯

家有墨蹟樂毅論韓長公攜至都門每過官舍必出一
玩較之余藏者字稍大賈亦貴重余此卷已著蘭亭考
米友仁跋乃米元章所藏之物梁摹樂毅論為正書第
一其卷有朱异僧權鑒賞紹興印信又有米氏印章非
此卷而何不知何幸得落余手王太史宇清多方欲得
之余實不能割舍借摹入石雖曰刻成與餘清齋石刻
差別遠絕此卷在余所藏三十載尚未盡知深奧處偶
病間細閱數次神彩煥發而肥瘦相停余年六十有一

方真知其妙也宋搨本余有至佳者安能與此卷並論
真稀世之物非千金不可輕棄也當同定武蘭亭行書
第一並傳此二卷真是性命可輕至寶是保餘清齋有
此藏書之願足矣子子孫孫宜世守不負余生平苦心
踪跡海內奇品也餘清齋主人吳廷敬書

昔人書估以雙鉤廓填為下真跡一等樂毅論是王右
軍正書第一而此卷鋒銳精到神明邁逸與墨跡無異
不意垂老觀此罕物天啟初同錢宮諭觀褚河南真跡

於吳蹇叔家以為妙絕然字稍大當知此更為逼真矣
連叔持示余西湖僧舍命顓兒嚮榻一過書而歸之崇
禎戊寅小暑倡菴道人陳嘉燧書

唐馮承素臨本樂毅論

在黃麻紙
上摺本

首錄褚遂良記一則

見前

彥遠家有馮承素蘭亭元和十三年詔取進書畫遂入
內今有承素樂毅論在並有太宗手批在後張彥遠記
隆慶三年元旦焚香盥手謹觀文彭壽承甫記是日有

禁不得賀節明憲淨几展玩數日甚樂甚樂再觀索幼
安出師頌帖蓋天地間二寶也文彭再記

山谷老人論書要字中有筆此帖近之然非有研白筆
麈者不足以知此隆慶己巳春日從三橋寓齋攜歸諦
觀因題其後歸之建業胡汝嘉記事

古搨王右軍書樂毅論石本

舊傳樂毅論迺羲之親書于石其他皆素紙所傳唐太
宗哀聚二王墨蹟惟樂毅論是石本其後隨入昭陵朱

梁時耀州刺史溫韜發陵得之復傳人間在宋高紳為
湖北轉運使道中聞砧聲清越因視之乃樂毅石刻覆
于下也而已斷裂矣遂載歸完理緝綴積以木箱所可
辨者如此世之傳布皆止於海宇則其碎而不可緝者
良可惜焉迨紳子安世物故轉屬趙立之處其重模者
猶有趙立之印一云公主以偽本易之原不曾入壙然
聞梁模本為餘杭公主所珍耳又董道以文皇于右軍
書特留賞蘭亭樂毅論別一小函貯之太平公主私取

樂毅論以歸及籍其家咸陽姬竊舉袖中投之竈下香
聞數日則原書故在紙也崇禎戊辰改元長至日得此
付官奴本于項氏為墨林鑒藏手神奕奕其整密處足
以砥砭大令之放蓋六本中之精好者無論停雲餘清
諸鐫懸絕即余家宋搨修內司本褚河南臨本亦逕庭
矣真下一等者乎因名之曰咸陽香帖稿李城南汪氏
玉識

時西席高公玄見之曰此右軍晚年筆也蒼勁中每

帶拙趣且帚墨迥異蠹紋斑駁其為皇祐以前所搨
奚疑正鑒賞間曹友瞻明俄至一覩此帖即下拜曰
願借三日以繹弘景所論極勁利而非用意處攜去
後旋懇公玄致予欲償原值俟模百本始璧余念宿
好聽之究為據舷之索可勝悵悵李太翁君實因云
樂毅論尊之者以為右軍訓子之式詆之者以為六
朝偽蹟出殷鐵石之手至沈存中云三館楷書非不
精不麗求其好處到死無一筆世所傳樂毅正是三

館楷書耳兒淵好摹帖余聊以是言解之墨池外史

珂玉再識

六藝之一錄卷一百六十一

欽定四庫全書

六藝之一錄卷一百六十二

錢唐倪濤撰

法帖論述三十二

東方朔畫贊

晉夏侯湛撰永和十二年書與王敬仁世以為王右軍書碑石舊在丁文簡家今在將作監官庫

右諸道石刻錄

東方曼倩畫贊筆圓淨而勁肥瘦得中但字身差長蓋

崔子玉字形如此前輩或隨時用一人筆法耳

予嘗觀東方畫贊墨蹟疑是吳通微兄弟書然不敢質也遣筆結字極似通微書黃庭外景經也如佛遺教經石刻止是經生書不可引與同列矣

右山谷題跋

畫贊世傳晉右將軍王羲之書考其筆墨蹊逕輒不類知後人為之託之逸少以傳也昔王濛子修嘗求書右軍王羲之為寫東方朔畫贊與之敬仁亡其母見

平生所悉悉內棺中故知此書不傳久矣唐自貞觀
購書逮開元搜訪亦既盡矣校定大王書二卷黃庭
第一畫贊第二告誓第三韋挺以畫贊是偽跡夫畫
讚已亡而更出者可知其為偽也今世所傳疑不在
韋挺論中彼得存于貞觀而入錄當亦有可亂真處
今之傳者不能便入貞觀錄也

右廣川書跋

平生所見東方生畫贊未有如此本之精神者筆意大

槩與賀捷表曹娥碑相似不知何人所刻石在何處
是可寶也

右晦菴題跋

元豐間有德州士人携畫贊示東坡自言二百年前本家
藏數世矣東坡為題之曰畫贊世多本惟德州者第
一君所藏又為德州第一或曉之曰此言君是德州
人耳其人雖不伏亦大笑止因觀武子所藏聊識卷
末

右放翁題跋

李陽冰上李嗣真論右軍書有云畫像贊洛神賦姿儀
雅麗有矜莊嚴肅之象視之信然

右樓鑰攻媿集

告誓文

王羲之告誓文今之所傳即其藁本不具年月日朔其
真本云維永和十年三月癸卯九日辛亥而書亦真
開元初潤州江寧縣瓦棺寺修講堂匠人於鷓鴣吻內

金定四庫全書
卷一百六十二
竹筒中得之與一沙門至八年縣丞李延業求得之
上岐王王以獻上留內不出或云其後却借岐王十
二年王家失火圖書悉為灰燼此書亦見焚矣

右國史纂異

逸少為王述所困自誓去官超然於事物之外嘗自言
吾當卒以樂死然欲一遊岷嶺勤勤如此而至死不
果乃知山水遊放之樂自是人生難必之事况於市
朝慕戀之徒而出山林獨往之言固已踈矣

右東坡集

王逸少晉宋間第一流人也遺情軒冕擺落世故蓋其平生雅懷自去會嵇內史遂不肯復出自誓於父母墓下詞致確苦予味其言而深悲之又讀所與謝萬石書云云按是時逸少春秋纔五十餘耳史氏不能賞取其高乃屑屑以為坐王懷祖之故待之淺矣

右容齋集

告誓文今入晉書傳中昔逸少為王懷祖徼也當時以

不能堪點摘細事遂脫幘自投朝廷以其誓苦故不
強起以官開元中此書得於潤州瓦棺寺講堂鴟尾
其書一字為數體一體別成點畫不可一槩求之實
天下竒作李延業獻之岐王十二年岐王宅焚則宜
世不得傳今碑字刻畫過於嚴重無復前法似是唐
妙手搭摸以傳陶弘景論書謂逸少自吳興前書猶
未為稱凡厥好蹟皆是永和十許年中自失郡告靈
不仕後略不復自書然告誓文已出當時知鴟尾得

者別本也貞觀書目已列告誓文武平一嘗見于小
函同樂毅論黃庭經共藏便知此本不一傳摹相承
不能辨其真贋也

右廣川書跋

遺教經

右遺教經相傳云羲之書偽也蓋唐世寫經手書爾唐
時佛書今在者大抵書體皆類此第其精粗不同爾
近有得唐人所書經題其一云薛稷一云僧行敦書

金定四庫全書
卷一百六十二
者皆與二人他所書不類而與此頗同即知寫經手
所書也然其字亦可愛故錄之蓋今士大夫筆墨能
髣髴乎此者鮮矣

右集古錄

僕嘗見歐陽文忠公云遺教經非逸少筆以其言觀之
信若不妄然自逸少在時小兒亂真自不解辨況數
百年後傳刻之餘而欲必其真偽難矣顧筆畫精穩
自可為師法

右東坡題跋

佛遺教經一卷不知何世何人書或曰右軍羲之書黃庭堅曰吾嘗評此書在楷法中小不及樂毅論耳清勁方重蓋度越蕭子雲數等

右山谷題跋

歐陽永叔以此為唐寫經手黃魯直謂此書在楷法中小不及樂毅論今世不知樂毅論已遭火而別本為薛宗徹所藏亡于五溪其搨本皆摹畫盡善者則亦

與寫經手何異但此書疏肥令密密瘦令疏自得古
人書意其為名輩所推良有以也昔張翼代羲之草
奏幾乎亂真褚遂良臨寫右軍亦為高妙但恨之自
然後人不見逸少蹟若碑刻所傳已多假偽則臨搨
善工自足惑世矣嘗得佛戒經其碑乃比丘道秀書
與此經一體率化衆緣共崇鐫刻則知為道秀所書
但世不傳爾道秀德宗時人其書當建中三年壬戌
蓋永叔魯直不見碑陰故所評如此

右廣川書跋

遺教經歐公謂唐寫經手所書明誠定著為唐遺教經則尚有可疑以世民二字俱如此寫不空筆畫恐非唐人書不若山谷之言不知何世何人得闕如之遺也

右攻媿集

孝女曹娥碑

右小字曹娥碑越州石氏所刻古雅純質不失右軍筆

意余平生所閱不下數十本俱不及此張雲門倪元鎮皆好古博雅之士其題語珍重如此可寶也元鎮題為辛亥歲蓋洪武四年在當時已不易得況今嘉靖壬子相去百八十一年又可多得邪太倉顧君出以相示漫識於此是歲冬十一月十日徵明時年八十有三

右珊瑚網

右軍曹娥碑搨法近古而精又文氏傳雲館物昔人謂

此書如幼女漂流於波浪間今求所謂漂流波浪之
勢了不可得意者其外弱而中勁庶幾得孝女意於
形似之表歟

右弇州續藁

曹娥碑真蹟宋高宗有跋元文宗以賜鑒書博士柯九
思趙吳興再跋余館師韓公得之長安有歷代題識
宋高宗但題曰晉賢書曹娥碑絹黯墨渝僅可想見
字形耳

右畫禪室隨筆

王右軍諸帖

借船帖

王羲之借船帖書之尤工者也故山北盧匡寶惜有
年盧公致書借之不得云只可就看未嘗借人也盧
出潞州旌節在途纔數程忽有人將書帖就盧求售
閱之乃借船帖也驚異問之云盧家郎君要錢遣賣
耳盧歎異移時不問其價還之後不知落於何人京

師書僧孫盈者名甚著盈父曰仲容亦鑒書畫精於
品目豪家所寶多經其手真偽無所逃焉公借船帖
是孫盈所蓄人以厚價求之不果盧公時甚急切減
而賑之日久滿百千方得盧公韓太沖外孫也故書
畫之尤者多閱而識焉

尚書
故實

竹葉帖

王逸少竹葉帖長安水丘氏傳寶之今不知所在三

十年前見其摹本於雷壽

東坡
題跋

稚恭帖

晉右將軍會稽內史王羲之之行書帖真蹟天下法書
第二右軍行書第一也帖辭云羲之死罪復想朝廷
清和稚恭遂進鎮東西齊舉想克定有期也羲之死
罪長慶某年月日太常少卿蕭祐鑒定在王珪禹玉
家後有禹玉跋以門下省印之時貴多跋後為章
惇子厚借去不歸其子仲修專遣介請未至是竹絲
乾筆所書鋒勢鬱勃揮霍濃淡如雲煙變怪多態清

字破損予臨得之

寶晉英
光集

破羌帖

王羲之桓公破羌帖有開元印唐懷充跋筆法入神
在蘓之純家之純卒其家定直久許見歸而余使西
京未還宗室仲爰力取之且要約曰米歸有其直見歸
即還余遂典衣增其直取回仲爰已使庸工裝背剪
損古跋尾參差矣痛惜痛惜

米芾
書史

破羌帖今在米淮陽家崇寧癸未春米在都下以泉

十五萬得之後有開元印記及陶穀等題字余嘗跋
之云晉穆帝永和十二年秋桓溫破姚襄于伊水遂
至洛時將以謝尚鎮之屬病不行此帖所叙桓公摧
破羌賊及喜仁祖小差正當時事也是時逸少去會
稽內史已歲餘方遁跡山水間宜不復以世務經懷
而此書乃歎宣武之威略悲舊都之始平憂國嗟時
志猶不息蓋素心如此惜其一憤遠引使才猷約結
弗光於世獨區區遺翰見寶後人覽之深為興歎

東觀

餘論

破羌帖寶晉齋謂之王畧帖洵是右軍名蹟然今之所傳或是老顛臨得者羌字落筆入頭太輕不似內史骨力惟戲魚堂乃極神雋八面變化幾與襖帖埒

墨林
快事

與周益州帖

右軍與周益州書凡三十許帖銓次者誤置兩卷中耳按周撫字道和穆帝永和三年桓溫攻成都李勢

降以撫為益州刺史彭模擊范賁獲之益州平封建

城公在官十年卒蜀人廟祠之

山谷集

筆陣圖

王晉卿所藏 筆墨之迹託於有形有形則有弊苟

不至於無而自樂於一時聊寓其心忘憂晚歲則猶

賢於博奕也雖然不假外物而有守於內者聖賢之

高致也唯顏子得之

東坡題跋

王右軍筆陣圖前有自寫真紙緊薄如金葉索索有

聲在章子厚家章公自云借于趙竦

竇章待訪錄

右軍筆陣圖凡二本其一正書差小有率更之清勁而小怯其一行筆甚道逸而不能脫俗氣或以為江南李主筆或謂李主不辨是斷非右軍蹟也亡論非右軍蹟即圖說非右軍所著也何者右軍十二而過江所謂之許之洛者何語也此圖之誤也華岳碑乃張昶非張旭也此書之誤也李衛公上華岳書麤豪不成語斷亦後人附會之談而結法却秀穎有唐人

氣以其皆宋搨極精微故合為一本置山房中配懷

琳絕交書成曆古一故事云

弇州續藁

筆陣圖有真行二本皆以為右軍書予以為無論張
昶作張旭字誤而已其文亦非右軍語乃六朝之好
事者為之予此正書真宋搨筆力適美髣髴信本而
古雅勝之行書差縱佳處與俗處相錯當亦是李重
光以前物也

同上

楊用修謂筆陣圖乃江南李後主偽作及覽蔡子正

跋尾謂陶穀學士得之李主所後穀之裔孫遺之蓋
陶性貪甚而寡識又以豪壓李主所白奪無厭李故
用懷琳故事作偽書裝潢古色以戲陶陶果不察而
寶藏之最後僮父強作解事引沈學士飢鷹夜歸渴
驥奔泉語災之石俱可笑也

弇州山人藁

來戲帖

黃麻紙字法清潤是少年所書滿一幅其間數字難
辨六朝寫經褊字注之後人復以雌黃塗蓋歲久膠

落字見五分在丁晉公孫受繪像恩澤者房下云晉公故物也欲以二十千見歸予即以其直取君以與余來往議此帖書粘於後質於其鄰大姓賈氏得二十千蓋意其可贖也今十五年矣猶在賈氏曾經人用薄紙搨書墨即透數行仍汙淨地深可歎息

米芾書史

尚書帖

王逸少尚書十二帖凡六十二行五百十有三字贍二滅一注五缺七字大觀戊子歲八月二十六日癸

勿洛陽官廨裝雲林子書

東觀
餘論

升平帖

晉史稱王逸少書暮年方妙此帖升平二年書距其
終才三載正暮年時也故結字比樂毅告誓諸帖尤
古質殊類鍾元常渾渾然有篆籀意非遇真賞未易

遽識也

東觀
餘論

狸骨帖

狸骨方今官帖中定為晉右將軍王羲之書唐人謂

此本荀興治勞之方右將軍臨之至今謂狸骨帖梁武帝嘗以古書襍蹟二卷問於陶隱居對以狸骨方是子敬書亦似摹蹟在梁已疑其偽今定為右將軍書果何据耶雖然右軍嘗寫此帖或子敬臨之亦不

可知也

廣川書跋

答庾元規帖

逸少於書自謂真出鍾草出張後生雷同失其當處敬元謂古肥進之謂今瘦書至瘦硬似是逸少迴絕

古人處若更論勢巧形密意踈字緩皆不足者也世傳
謂羲之書初不勝庾翼郝愔及其暮年方妙嘗以章
草答庾亮而翼遺書曰張伯英章草十紙過江顛狽
遂乃亡失常歎妙蹟永絕忽見足下答家兄書煥若
神明頓還舊觀羲之書法正自然功勝豈待積學而
至哉議者不知書有天機自是性中一事而學習特
求法度規矩耳至于離方遁圓不守繩墨自作勝槩
謂非天德不可也但見庾翼此語便謂初不若翼愔

不知此語何所憑藉而知其昔不逮二子耶

廣川書跋

甘蔗帖

此帖中云甘蔗十丈初不可曉因思曹子建詩云都蔗雖甘杖之必折十丈云者恐若木千章竹萬箇之類蔗似竹於文从焉此帖以之俗從草非是

東觀餘論

治頭眩方

治頭眩方世傳王逸少書今絳州石帖中有此帖甚著於世政和丁酉歲六月七日襄州教授丹陽陳君

孝友見過云崇寧間彭諫議君時守潯陽役兵于山
間斲石得一大石中空內有小石若碑版然視之有
刻文卽此碑也大石未破時堅完無際不解緣何中
有此碑殊可異也陳之父時亦官潯陽得此拓本陳
因以見遺視之比絳帖差縱逸結字互有工拙要之
此本當在絳刻前但不知何世所刻按逸少嘗在江
州豈晉以後好事者因移寫于斯石歟意其薶沒既
久土或變石故是刻藏於石間理不足怪世或以此

帖為虞永興書恐未必然或虞嘗臨此書故微翻其體今世所有魏晉諸帖中往往唐人臨撫爾洪纖拘放結體不一真賞者自能辨之是月九日黃某於丹

陽東齋書

東觀
餘論

虞世南理頭眩藥方雙鈞摹本在鮑傳師家後為俗人添入羲之兩字傳入晉州法帖以為羲之書龔璿

可笑

米芾
書史

論諸葛昏書

案此卷有論諸葛昏書案謝石嘗求昏諸葛恢稚女
恢不許及恢亡乃成昏於是王右軍往謝家看新婦
猶有恢之遺則威儀端詳容服光整王歎曰我在遣
女裁得爾耳始不知何與逸少事而嗟賞若此及觀
此帖乃云二族舊對故欲結援諸葛若以家窮自當
供助昏事又云欲速知決始知右軍為主茲事故觀

謝婦發此歎也

東觀
餘論

快雪帖

晉右軍王羲之書雪晴帖真蹟在承務郎吳郡蘇激處集賢校理舜欽子也帖尾有古跋君倩字及褚氏

字印

寶章待訪錄

晉右軍將軍會稽內史王羲之字逸少書快雪帖見張彥遠法書要錄本朝參知政事蘇公太簡家故物故有翰林學士院印唐賜魏丞相徵傳之子孫故有鄭公之後印又傳於褚遂良之孫長史故有褚印予在都下以好玩十種易於蘇太簡孫祕書激字志東

志東與余德友也蘇才翁子美有跋及國老押署紹
聖丙申以示翰林學士蔡公仍以翰林印印之即太
簡作翰林時所用一日駙馬都尉王晉卿求之不與
已乃剪去國老署及子美跋著於摹本乃見還因詳
錄得之之自紹聖丁酉海岱樓題米芾審定
寶晉英
光集
快雪帖相傳為右軍正書今在真行之間米老亦有
此疑米老有小楷跋語未知其論何如也
書畫
眼

二謝帖

右軍真蹟近世漸少觀二帖紙札尚完殊可愛也案
正觀日錄洎淳化法帖皆不收此豈當時為好事者
祕藏不出邪熙寧丙寅冬至日丹陽蘇頌子容餘杭

郡西閣題

魏公題跋

右軍書法萬世所宗昔人稱歐虞之體謂如壯士美
人者但能精於一偏尚且傳之後代而況得其全者
哉是知此字當使好事者寶之也元豐乙丑五月望

日西安縣齋丹陽崔希仲德舉題

珊瑚網

正觀尤愛右軍書訪求殆盡其後并葬昭陵今所存
法帖人謂皆哀疾之間故不復進上得傳於後豈其
然乎此書亦然又法帖之所遺也當用文錦玉軸重
裝以遺子孫寶之海陵曹輔子方信安郡齋書
王逸少二謝帖真蹟七十六字後有趙清獻公抃并
蘇子容等跋帖云二謝書云即以七日大斂冥冥永
畢不獲臨見痛恨深至也無復已已武妹脩載在道
終始永絕道婦等一旦哀窮並不可居處言此悲切

珊瑚網

倍劇常情諸不能自任未遂面緣撫念何已不具義
之頓首字畫亦無殘缺但墨氣已盡斂字上著草右
旁加爻具字大類之字較之石帖其結體用筆頗不
相類此余鄉顧山周氏世物子孫欲求售特携以問
價於文衡山衡山曰此希世之寶也每一字當得黃
金一兩其後三十一跋每一跋當得白銀一兩更有
肯出高價者吾不論也後典于閭門一富家止得米
一百二十斛竟不知下落矣惜哉

戒菴
漫筆

思想帖

本文補
錄于後

大德二年二月廿三日與霍公謹集鮮于伯幾池上

郭右之出右軍思想帖真蹟有龍跳天門虎臥鳳闕

之勢觀者無不歎賞神物之難遇也孟頫書

戲鴻堂
法帖

右軍真蹟世所罕有此思想帖與余舊平安帖行筆

墨色略同皆竒蹟也平安帖有宋海嶽籤題此帖無

籤題而有趙魏公跋同觀者自霍清臣而下凡十有

三人皆鑒賞名家咸咨嗟歎賞神物之難遇若此余

何幸得附名其後哉嘉靖丁巳冬十一月十有三日

長洲文徵明題時年八十有八

續書畫
題跋記

雨晴帖

羲之與子姪輩書草草似不經意及尋繹之筆筆皆有位置如大辨智人雖語默無常悉證於道此帖是也千載間雖有作者往往得彼失此曷能集大成也

宋曹勛
松隱集

瞻近帖

右羲之瞻近帖行書之狎鄰於草者也典午冲靚放
曠之風烏衣諸王富貴居養之素藹然見豪楮間宜
其名百世也第宋淳化宣和似搜括晉帖靡遺而此
帖獨不見有表識豈非金源得宋故物易故以新而

然歟明昌七印籤帖金書全倣宣和其篆籀朱法精
麤不侔後世瞭然在目假令當時不相師法政未為

失觀辨章良公成甫家清玩見右軍真蹟二帖當亞

快雪至正丁酉閏月己未廬陵歐陽玄識此

歐陽原
功圭齋

野鳧帖

昔年危內翰太樸出示羲之野鳧帖且云別有喜色
帖在江右出自丞相周益公家傳授次第一一有據
湏溪劉會孟平之謂如蘭亭裏鮓尤為佳絕濂恨未
見之近豫章人士來求墓文忽持此帖為贗須溪題
識宛然居後因驚喜曰此殆太樸所言者徧示中朝
善書者咸定為真蹟無疑或取唐臨者比之神氣復

然不侔鄱陽劉彥炳最號精鑒法書日閱此而不厭
狂欲起舞真偽之辨固自有異哉須溪所書名中藏
三代人物字偽署者輒易別謾并及之

宋學士集

遊目帖

余在京師數見右軍墨蹟率皆窘束羞澀類鈎摹而
成者決知其非真也今觀此帖寓森嚴於縱逸蓄圓
勁於蹈厲其起止屈折如天造神運變化倏忽莫可
端倪令人驚嘆自失世之臨者雖積筆成山吾知其

不能到非右軍誰足以與此哉或以紙筆未故為疑
 祕閣有唐初誥文紙色如新則此帖之尚完不足怪
 也浦江鄭君仲辨最博雅善書亦謂為右軍真蹟無
 疑相與熟玩久之因識其後

遜志齋集

此事帖

一作每思帖 本文及揭
 僖斯唐寅二跋補錄于後

右王右軍此事帖凡二十字蓋嘗為金源氏物章宗
 數印猶爛然楮墨間簽題亦其手書信可寶也成化
 戊戌歲五月壬午吳寬觀於徐太守維亨為題

鮑翁家藏

集

袁生帖

右袁生帖曾入宣和御府即書譜所載者淳化閣帖第九卷亦載此帖是又曾入太宗祕府而黃長睿閣帖考嘗致疑於此然閣本較此微有不同不知當時臨摹失真或淳化所收別是一本皆不可知而此帖五璽爛然其後暉紙及內府圖書之印皆宣和裝池故物而金書標籤又出裕陵御筆當是真蹟無疑此

帖舊藏吳興嚴震直家震直洪武中仕為工部尚書
家多法書名畫後皆散失吾友沈經時購得之嘗以
示余今復觀於華中甫氏中甫嘗以入石矣顧此真
蹟無前人題識俾余疏其本末如此嘉靖九年六月

三日文徵明識

書畫題
跋記

千嘔帖

晉右軍王逸少書千嘔帖其字畫圓勁雄雅而紙亦
古色是知唐初人所臨也於行書空間直界成路蓋

為久而卷舒恐致褻絹絲紋磨損字面故置之書筒
而祕之乃知前人寶愛如此之篤太宗時已嘗刻諸
淳化古帖石中上有南唐內合同并集賢院印及卷
首尾古印朱文十數又鶯溪黃素革首前後皆用宣
政內府圖書印之當必數帖成軸不然何以革首外
邊各亦有印文邪今存者此帖耳是以書譜止載其
首帖之號云皇慶二年十二月朔喬篁成仲山父題

王氏法

書苑

右晉右將軍王羲之干嘔帖嘗刻之淳化帖中以石
刻較之分毫無異真至寶也或者謂其紙墨蕭瑟或
又謂其為唐模政不必計也其筆法高古斷非後人
所及今見石刻一行半段皆寶惜之況此帖典刑具
存非水月鏡象可比者乎其直界成路喬仲山以為
置書筒中者非也古人寶愛名帖嘗以自隨如王世
將得索靖廿四日帖置之衣帶中至宣和間摺痕猶
在即此類也其週遭諸印多用赭墨亦非後人偽為

長洲文彭謹題

王氏法
書苑

鵑不佳帖

鵑當是右軍諸孫小字右軍自誓墓後謂我卒當以
樂死然聞語凝之輩藍田望不逾我而位遇遼邈當
由汝曹不如坦之邪今又云鵑等不佳都令人弊見
此輩吾衰老不復堪此曹公有云生子當如孫仲謀
人於子孫雖賢豪不能忘情劇可歎也此帖連白石
枕鄴中戰場諸蹟為濮中李少師東之家物米元章

之父阿奢以弈勝獲之遂為米氏物後有尊德樂道
印見元章書史甚詳今則割為一卷而有開成二年
柳公權記一條豈全卷題字亦隨之而割耶結體比
他蹟形勢稍廓落而道聳雄邁有威鳳翔霄神駿追
影勢余老矣後先所見右軍父子手筆唐臨至八本
譬之玄奘入五印度觀薄伽梵金光明相能不悲喜

敬題於後

弇州
續藁

大熱此月淡悶三帖

余前得先右軍大熱此月二帖於崑山顧氏乃黃琳
美之家物轉入陸太宰全卿顧氏其外孫也大熱帖
更世久紙墨已盡揭而猶有搵入膚理者細玩之極
純雅可愛當是真蹟此月帖筆勢圜逸而間有襄陽
意疑為米南宮臨本後得淡悶干嘔帖於慧山談氏
印識題跋甚衆結法精美有度而發筆微怯據鑒定
以為唐人臨本也真蹟縱潦倒如裴叔則病劇回眸
猶足掩映數人臨帖從真蹟上翻出優孟抵掌尚近

於王孫隆準薛紹彭云古囊織縹可復得白玉為躡

黃金題況為之後者乎珍重珍重

弇州山人藁

右軍大熱帖紙紋磨滅幾盡而墨色黯然猶具完字
政如李夫人游覓居幃帳中可望而不可即此一竒
也且鋒勢純熟無纖豪作意摹擬態定臨本淡悶帖
在宋時黃祕書即有定論以為非後人偽作此本則
非出過庭臨蓋唐人草得二王法無踰孫者其落腳
差近前而直皆孫筆也此月帖王長公鑒為米家風

非入書家三昧者不能斷此語世間無論有晉魏幾人解識真唐隋當時薛米諸人第得見我輩不至於

詡若爾

莫廷韓集

清晏帖

此帖致佳乃釋之者最可笑或作有異產已可捧腹至云所使有豐一鄉是何言語況并出亦改為使愈不可解細繹之乃所出有無一之也始渙然明了蓋所出者地產之也所有者非地產而聚於此者皆無

一乏也文義章法無一牽強右軍諸帖如此等處多

有之不能盡辨

墨林
快事

積雪凝寒帖

此六十三字表裏瑩徹骨肉和暢有法有致最為合

作乃載在長沙本者今閣帖盛傳而他帖皆不聞海

內收之者古哲名蹟可惜矣而賞鑒之苦心靈識亦

與之俱澌均可惋悵後世有大力者一蒐而表章之

庶不致洪鍾瓦缶之歎耳

墨林
快事

霜寒帖

右軍諸書果無有純於真者唯此收于絳帖馴雅整
栗寄巧於拙藏老於嫩有不可盡之妍米謂右軍無
真字而以快雪帖為真快雪今盛傳未見真體故又
疑米所見另一帖果爾則此帶行者誰復能為之必
老顛誤憶以此為快雪帖耳快雪之為行書既審則真
書以此為第一又何疑乎

墨林
快事

此郡帖

余知右軍非晉賢茲觀其治郡大畧苦於逋滯是必
清理無留難也舍逸而就勞是耐鞅掌不鄙俗役也
至於人事請託則又近情善處不致乖迂而獨坐一
語又非深明於得人先有司之心法者不能道恐先
哲之美為字學所蓋故於評字而推言之不以為煩

焉墨林
快事

月半帖橘帖

右軍月半帖褚愛州所論序也橘帖余曩在都見數家

有此墨本或肥或瘦真偽不可知要皆有數筆佳可
愛韋蘓州詩云憐君臥病思新橘試摘才酸亦未黃
書後欲題三百顆洞庭須待滿林霜蓋取諸此 又

曰巴峽士大夫舊無書種多不善書南賓太守王聖
涂有此墨蹟摹刻州學中它日後追有能書者當推

此書為種

山谷題跋

玉潤帖

羲之玉潤帖是唐人冷金紙上雙鈎摹帖云官奴小

女玉潤病來十餘日了不令民知昨來忽發痼至今
轉篤又苦頭癰頭癰已潰尚未足憂痼病少有差者
憂之焦心良不可言頃者艱疾未之有良由民為家
長不能克己勤修訓化上下多犯科誡以至於此民
惟歸誠待罪而已此非復常言常辭想官奴辭已具
不復多白上負道德下愧先生夫復何言此帖連在
稚恭帖後字大小一如蘭亭想其真蹟神妙快雪時
晴帖云羲之頓首快雪時晴佳想安善未果為結力

不次王羲之頓首山陰張侯是真字數字帶行今世
無右軍真字帖末有君倩二字疑是梁秀縫有褚氏
印是褚令所印蘓氏有三本在諸房一余易得之一

劉涇易得無褚印

襄陽志林

官奴帖在淳熙秘閣續刻米元章所謂絕似蘭亭叙
昔年見之南都曾記其筆法於米帖曰字字蹇翁勢
竒而反正藏鋒裏鐵道勁蕭遠庶幾為之傳神已

容臺

集

內史官奴帖

楊傑處得貞觀內史官奴帖余以十七帖以下諸物
易歸余家余先於唐堯處易得右軍尚書帖云得於
僧道清亦有貞觀印印文遂復合仍帶元截紙痕一
條故一物也林希見余家此軸歎云祕府所有殆不
過是嘗見閣下一卷貞觀字印相去五寸許不相連
若真印印則四枚理無平勻若偽雕必只一鈕用皆
齊一也余聞之愠甚懶展閱愠極試取視之左右上

下無一相當者疾呼林過與語所以公擊節曰公此書愈妙也方是時劉涇不信世有晉帖後十五年始得子鸞字帖云是右軍余云恐陳子鸞未經余目後

薛紹彭亦云六朝書

襄陽志林

官舍尚書二帖

晉將軍會稽內史金紫光祿大夫王羲之字逸少官舍尚書二帖第一帖易于今坊州使君劉涇第二帖易于禮部員外楊傑唐貞觀御府物至于家貞觀二

小璽復合神物離合真有數耶自丙寅至壬午十七

年間以紙毛三洗跋時崇寧紀元五月十五日

志林

丙舍帖

唐人摹右軍丙舍帖暮年書在呂文靖丞相家淑問

處法書要錄載是臨鍾繇帖薛紹彭摸得兩本一以

見贈

志林

趙吳興云蘭亭與丙舍帖絕相似官奴帖與丙舍又

一家眷屬也

書畫眼

右軍黃麻紙十餘帖

濮州李丞相家多書畫其孫直祕閣李孝廣收右軍
黃麻紙十餘帖一樣連成卷字老而逸暮年書也畧
記其數帖辭一云白石枕殊佳物深感卿至一云卿
事時了甚快羣凶日夕云云此使鄴下一日為戰場
極令人惆悵豈復有慶年之樂耶思卿一面無緣可
歎可歎一云九日以當力見一云重熙八日過信安
一云祠物當治護信到便遣來謝云善錯也一云忽

書云忽今送一云鶻等不佳令人弊見此輩吾衰老不復堪此餘不記也後有先君名印下一印曰尊德樂道今印見在余家先君嘗官濮與李柬之少師以基友善意其弈勝之余時未生此帖一卷世未見其比

故是右軍名札

志林

右軍唐摹四帖

右軍唐摹四帖一帖有裏鮓字薛道祖所收命為裏鮓帖兩幅是冷金硬黃一幅是楮薄紙摹乃右軍摹

年更妙帖也其一幅云欲與彥仁集界上平自可且
何所諮人乃王道平平其平字音便又見晉人語氣
上有弘文印印在帖心面上不印縫四邊亦有小開
元字即御府帖也宋子房收得唐開元摹右軍帖未
有李林甫等臣跋今歸王詵翰林印皆在也內異熟
一帖歸薛紹彭家

林志

王略帖

米芾在真州嘗謁蔡攸於舟中攸出右軍王畧帖示

之元章驚歎求以他畫易之攸有難色元章曰若不
見從某即投此江死矣因大呼據船舷欲墮攸即與

之志林
塵談

薦謝玄真蹟

王右軍與桓温薦謝玄真蹟用繭紙書字輕清不類

右軍後有駙馬蔡璿跋楊和王故物也牡丹錦標首

儼然着色畫蓋宣和法錦也右鮮于伯機樞所藏雲烟

過眼錄

右軍得告帖

晉右軍得告帖又快雪時晴帖皆真蹟有米老跋遂
以名齋且刻石葉森曾見此二帖神韻精彩右張與可
斯立所藏

全上

司州帖

黃紙書金章宗泥金書簽明昌七印全右總管太中

灤陽趙伯仁舉收藏

全上

明昌七印其一曰內府葫蘆印其二曰

闕

玉祕珍其

三曰明昌珍玩其四曰明昌御覽其五曰御府寶繪
其六曰明昌中祕其七曰明昌御府

屏風帖

硬黃紙書徽宗泥金題籤首尾天水宣政內府圖書

等印俱全右總管太中灤陽趙伯仁舉收藏

全上

王右軍清和帖

想清和士人佳也此平安安石過停數日日無為樂益
增想想孔長史安善足下令知問累有書也足下入年

哀得俱還不思遲以日為歲

元素將還翰苑子瞻欲赴高密與寶臣來同遊法惠
至言師舍同觀熙寧七年九月十七日題

元祐四年七月廿五日復至法會言公化去已七年
矣見其小師微惘然如夢耳 子瞻書

熙寧八年八月朔過雪峰謁言師觀此帖莆陽蔡元
度隴西李無悔寺僧潛聖

微上人自西菴携過山林因得一觀 襄陽米黻

王右軍思想帖

羲之頓首不復見君甚有思想得告慰之故吾之氣兼
以瘳下憂深不佳尅面王羲之頓首

趙孟頫文徵明二跋見前

王右軍此事帖

明昌御鑒 山谷道人黃長睿印

比有此事以與卿共事每思不以法和欲不可長

右軍瀟洒更清真落筆奔騰思入神裏鮓若能長住
世子鸞未必可驚人蒼藤古木千年意野草閒花幾

日春書法不傳今已久楮君毛穎向誰陳
揭傒斯
拜題

黃伯思辨帖文精別毛髮理析毫釐華光祿尚古嘗
刊其所著行于時今收王帖片掌必有見于中耳昔
人相馬妙盡神凝驪黃為別者未必良工也余何能
為言 唐寅

王右軍瞻近帖

歐陽玄跋

見前

余居秘府時閱晉諸名家帖而右軍羣昆季居多荷
華裹鮓神俊天出評者以龍跳天門虎卧鳳闕擬之
信不誣矣此帖骨相益豐豈操觚在來禽喜色之前
耶不見賞于徽宗而見珍于完顏臨風撫卷足為世
道一嘅 前翰林孫贄

都昌宋天章嘗示余獻之鄱陽帖每憾其絹素未古
此帖與金華宋仲珩所收周益公家喜色帖紙墨相
類筆法精妙真頗無疑良金美玉可得而此卷不可

得寶之寶之 丙寅夏日鄱陽劉昂

二王行穰中秋二帖

萬厯戊午于吳江周敏仲舟中獲觀右軍行穰帖止
存二行約二十餘字在黃麻紙上書法精彩異常惜
無前賢跋後項子京自叙數行董玄宰題云此帖所
至處常有青雲覆其上但肉眼自不見耳又大令十
二月帖截中秋三行紙色與行穰相似書法適密亦
無跋語玄宰題數行後書君家子敬十六字氣壓鄴

侯三萬籤 繡里汪珂玉識於漱六齋

六藝之一錄卷一百六十二

欽定四庫全書

六藝之一錄卷一百六十三

錢唐倪濤撰

法帖論述三十三

右軍十七帖

逸少自謂吾書比鍾繇當抗衡比張芝草猶當雁行
後世論者或異其說至唐然後無異詞信謂其書定
出鍾張右而來者不復有異庾肩吾以芝工夫第一
謂繇天然第一而逸少工夫不及張天然過之天然

不及鍾工夫過之然嘗考之芝臨池學書池水盡墨
絲卧畫穿被於工夫至盡不可謂後于逸少也今觀
其書卓犖天成者蓋逸少所能其謂積學而至者恐
不得筆力妙處觀十七帖者當以是求之

廣川書跋

右王逸少十七帖廼先唐石刻本今世間有二其一
於卷尾有勅字及褚遂良解如意校定者人家或得
之其一即此本也洛陽李邕鄆家所蓄舊本頗與此
相近其餘世傳別本蓋南唐後主煜得唐賀知章臨

寫本勒石寘澄心堂者而本朝待書王著又將勒石
勢殊疎拙又有一版本亦似南唐刻者第叙次顛舛
文為十七帖而誤目為十八帖摹刻亦瘦削失真獨
勅字本及此卷本乃先唐所刻右軍筆法具存世殊
艱得誠可喜也按張彥遠法書要錄與余所著法帖
刊誤論此帖本末頗完今並列於左方云政和二年
五月初吉黃伯思書

東觀
餘論

逸少書自六朝以降一人而已故歷代寶之以為大

訓唐太宗殊加愛重至為親作傳紹興天子尤喜之
以千金易一字真蹟遂多又為書其傳千載之下何
其幸也此十七帖乃江南李氏墨本字不失真形範

高古思賢宜珍藏之

曹勛松
隱集

官本法帖號為佳玩然其真偽已混淆矣如劉次莊
有能書名其所刻本亦有中分一字半居前行之底
半居後行之顛者極為可笑惟此十七帖相傳真的
當時雖已入官帖卷中而元帖故在人間得不散亂

此本馬莊甫所摹刻也玩其筆意從容行裕而氣象
超然不與法縛不求法脫真所謂一一從自己胷襟
流出者竊意書家者流雖知其美而未必知其所以
美也書詞問訊蜀道山川人物屋宇圖畫至纖至悉
蓋深有意於遊覽而竟不遂豈所謂不朽之盛事信
難偶邪因念頃年廬阜終更諸公議遣使蜀而孝廟記
憐不欲使之遠去議乃中寢然東留訖無補報而徒
失西游之便每以為恨今觀此帖重以慨然又憶仙

遊之日遠無復有意於人世也熹記

晦菴題跋

唐貞觀元年詔京官職事五品以上子嗜書者二十
四人隸弘文館習書出禁中法書以授之尋又置撮
書三人此館本之始也開元六年命整理御府古今
工書鍾王等蹟得一千五百一十卷視貞觀時無所
增減龍朔三年裝進館內法書至九百四十九卷然
則當時館本必不止十七帖此十七帖特以世所共
傳而其後有勅勒充館本故名之曰館本十七帖耳

卷尾僧權二字不完是梁之徐僧權云

黃文獻
公集

右軍十七帖因首有十七日字故名八碑共二十九帖中間多與淳化法大同小異佐家藏者是木版絕妙但不能及其所從來宣德中佐見大理寺丞蘇州仰瞻所藏石本後有唐文皇押字疑其為館本也宋黃長睿云右軍草書十七帖最為可師此書中龍也

佐識

格古
要論

右十七帖不全石刻在關中近時蔣侍御伯宣亦刻

石於吳下顧不若此刻猶存拙意也黃伯思亟稱此帖為書中龍蓋妙在行款耳此本行款當為模勒者展促亦失之矣昔唐太宗購二王書右軍書有三千餘紙取其迹以類相從率一丈二尺為卷此帖亦一丈二尺凡百七行九百二十三字余收有淳熙修內司帖一卷行款正同後復得趙松雪對臨墨蹟皆神采煥然可寶也往時周府東書堂晉府寶賢堂各用入刻皆不復知此矣漫記於此

陸深儼
山集

右軍書記 十七帖長一丈二尺即貞觀中內本也
一百七行九百四十二字是烜赫著名帖也太宗皇
帝購求二王書大王草有三千紙率以一丈二尺為
卷取其書迹及言語以類相從綴成卷以貞觀兩字
為二小印印之褚河南監裝褙率多以紫檀軸首白
檀身紫羅標織成帶開元皇帝又以開元二字為二
小印印之跋尾又列當時大臣等十七帖者以卷首
有十七日字故號之二王書後人亦有取帖內一句

語稍異者標為帖名大約多取卷首三兩字及帖首

三兩字也

法書要錄

十七帖者必多臨本永禪師及虞世南褚庭誨臨寫

皆不相遠故世有數本皆不同此帖全是庭誨筆意

如揚雄蜀都以下似拙工寫真但神癡耳

右評長沙法帖山

谷題跋

予嘗見畢文將叔云家有唐初人所摹此帖來禽等

四物外又有密蒙華一種先丞相文簡公荅王黃門

寄密蒙華詩云多病眼昏書懶讀煩君遠寄密蒙華
愁無內史詞兼筆為寫真方到海涯蓋謂此也然余
按今諸本並無此一種而法書要錄十七帖亦不載
此不知何緣畢氏本有之但未嘗見此帖無從知其
真偽始記于此以俟後觀云

跋唐人所摹十七
帖後東觀餘論

十七帖釋文

十七日先書郝司馬未去即日得足下書為慰先書
以具示復數字

吾前東粗足作佳觀吾為逸民之懷久矣足下何以方復及此似夢中語耶無緣言面為歎書何能悉

瞻近無緣省告但有悲歎足下小大悉平安也云卿當來居此喜遲不可言想必果言告有期耳亦度卿當不居京此既僻又節氣佳是以欣卿來也此信旨還具示問

龍保等平安也謝之甚遲見卿舅可早至為簡隔也知足下行至吳念違離不可居叔當西耶遲知問

計與足下別廿六年於今雖時書問不解濶懷省足
下先後二書但增歎慨頃積雪凝寒五十年中所無
想頃如常冀來夏秋間或復得足下問耳比者悠悠
如何可言吾服食久猶為劣劣大都比之年時為復
可耳足下保愛為上臨書但有惆悵

省足下別疏具彼土山川諸竒揚雄蜀都左太冲三
都殊為不備悉彼故為多竒益令其游目意足也可
得果當告卿求迎少人足耳至時示意遲此期真以

日為歲想足下鎮彼土未有動理耳要欲及卿在彼
登汶嶺峩眉而旋實不朽之盛事但言此心以馳於
彼矣

諸從竝數有問粗平安唯修載在遠音問不數懸情
司州疾篤不果西公私可恨足下所云皆盡事勢吾
無間然諸問想足下別具不復一一

得足下旃罽胡桃藥二種知足下至戎鹽乃要也是
服食所須知足下謂須服食方回近之未許吾此志

知我者希此有成言無緣見卿以當一笑

云譙周有孫高尚不出今為所任其人有以副此志
不令人依依足下具示嚴君平司馬相如揚子雲皆
有後否

天鼠膏治耳聾有驗否有驗者乃是要藥

朱處仁今何在往得其書信遂不取答今因足下答
其書可令必達

省別具足下小大問為慰多分張念足下懸情武昌

諸子亦多遠宦足下兼懷竝數問不老婦頃疾篤救命恒憂慮餘粗平安知足下情至

旦夕都邑動靜清和想足下使還一一時州將桓公告慰情企足下數使命也謝無奕外任數書問無他仁祖日往言尋悲酸如何可言

知有漢時講堂在是漢和帝時立此知畫三皇五帝以來備有畫又精妙甚可觀也彼有能畫者不欲摹取當可不須具告

住在都見諸葛顛曾具問蜀中事云成都城池門屋
樓觀皆是秦時司馬錯所修令人遠想慨然為爾不
信一一示為欲廣異聞

青李來禽櫻桃日給藤

已上
四行

子皆囊盛為佳函封多

不生足下所疏云此果佳可為致子當種之此種彼
胡桃皆生也吾篤喜種果今在田里惟以此為事故
遠及足下致此子者大惠也

彼所須此藥草可示當致

虞安吉者昔與共事常念之今為殿中將軍前過云
與足下中表不以年老甚欲與足下為下寮意其資
可得小郡足下可思致之耶所念故遠及

吾有七兒一女皆同生婚娶以畢惟一小者尚未婚
爾過此一婚便得至彼今內外孫有十六人足慰目
前足下情致委曲故具示

已上十七帖也

法書要錄

唐臨十七帖

鐵網珊瑚

此帖唐人書無疑得子昂完補遂成全物當與蘇子
美補懷素自叙同一珍祕視朱繇為道玄者異矣

鄧文原

臨書如九方臯相馬遺其玄黃筆意洞達妙在轉摺
若拘然位置不復有神韻矣唐臨十七帖較閣本多
異此卷紙品墨色真數百年物宋惟蘇才翁米襄陽
得此妙解能書者必能深辨 袁桷

觀補者之難能則知臨者之不可及觀臨者之不可

及則知想像所臨者如飛仙神龍之不可測識矣

桷又題

此特唐人所摹搨其筆意沉著已如此不可及況真

蹟耶

楊載

松雪補書固不逮唐人然風氣自可相較恨不及見

青李來禽真蹟與此臨本又當何如耳

張雨

松雪翁負書名於當世然八法回斡之際真不媿古人觀唐人所摹帖不完處數行但神采沉著處知公

不逮古人多矣觀者粲然奚待贊述雖然渡江以來
二百餘年鮮能與公並駕者後此以往又未審孰能
繼之臨風慨歎 陸行直

右唐人所臨王右軍司州等三帖用筆沈著轉摺熟
圓自歐陽法中來至其妙處從容中道誠書法所不
可無也吳興趙翰林補其不足前人已評之故不論
平原陸友仁好論書座中見此帖謂楊漢公所臨良
是 柯九思

吳興趙文敏公以書法稱雄一世觀其手補唐人所
臨右軍司州瞻近漢時三闕帖殆如叔敖優孟雖神
采不無渺茫之殊見者當未易辨也 項炯

右十七帖真唐人所臨本沈著清勁蓋未易得間缺
數行而吳興趙松雪補之好事者所收闕其三帖自
諸從並數有問至不信其告於是博采之而三帖復
得於戴氏厚甫之家宛然為完卷此豈偶然也哉神
物離合固自有時不啻干將之與莫邪也邵君文伯

好古博雅一旦得其全於構求分散之餘足以知其嗜好之篤幸寶藏之 蔣堂

逸少八帖

逸少於書自分今古至於行草逮永和間極於功力矣故所書紫紙多是少年臨川時蹟至其中年競用麻紙蓋欲其行筆流便屈折如意蔡邕自矜能書非流紈體素不妄下筆以故點畫無失書法入妙韋誕亦謂用張芝筆左伯紙任及墨兼此三具又得臣手

然後可以建徑丈之勢方寸千言觀此益見古人於書蓋不敢易而為之如此丹陽邵仲恭得逸少八帖經生所書也此當是唐人善書者為之然流暢晃朗勢若飛動得步武於王良猶有舞交衢之態者也

廣川

書跋

題右軍帖

予嚮見二王書帖多矣疑非真蹟應是響搨然筆勢圓勁無毫釐之差都莫能辨其是否所可辨者一紙

數帖及用硬黃耳昔唐文皇好二王書天下訪求遺
跡殆盡彼時已患歲久恐遂磨滅因命搨書手趙模
輩傳搨數百本藏之禁中或分賜王公得之者已為
祕寶矣故當時語云趙模摸一紙尚直數萬錢今觀
說之所收一軸凡四紙一十帖實竒跡也卷末題蕭
祐者元和人起處士仕至桂管觀察使書畫竒妙嘗
叙鍾王遺法蕭張筆勢編集真偽為二十卷上之又
題凝式正臣則楊少師也每紙皆有正臣字應是其

家舊物也丹陽蘓頌題

魏公題跋

王大令書

洛神賦

獻之洛神賦蹟遺頭尾外得一十三行都二百五十

字重加整背祥符八年八月十日周越記

戲鴻堂法帖

子敬能作方丈字觀其細書巧妙方丈不足為大令

右軍法雖同其放肆豪邁大令差異古人用功精深

所以絕迹也治平三年三月廿八日襄

全上

予嘗疑洛神賦非子敬書然以字學筆力去之甚遠
不敢立此論及今觀之宋宣獻公周饒部少加筆力

亦可及此

山谷
題跋

今世所傳洛神賦予見者四本惟王和甫家者號最
勝結字踈密得法然不若此書亦自與周子發家者
稍異子發謂子敬愛書洛神賦人間宜有數本似未
見其餘也昔馬澄評右軍書謂勸進洛神賦諸書十
餘種皆作今體知逸少嘗書此賦子敬當是習其家

學爾然書錄不記子敬洛神賦其傳之失實將後人摹搨不可知也字法端勁是書家所難偏旁自見不相映帶分有主客趣鄉整嚴非善書者不能也大觀

元年為安希古書

廣川書跋

逸少此賦當時以為第一今無復存者但子敬所書猶傳疑未可以伯仲論也謝安石嘗疑子敬不逮父書後世或謂不可復辨且曰外人那得知豈書法雖一藝彼亦自有至處恐非造其域者不能致論也此

書摹傳失據更無神明點畫存爾非子敬書法盡此

也

全上

大令好書洛神賦而李陽冰論右軍書與畫像贊同
稱右軍之蹟不可復見不知更勝此否柳公權記於

前璨題其後何止公慙卿耶

松隱集

晉王獻之所書洛神賦十三行二百五十字人間止
有此本是晉時麻牋字畫神逸墨彩飛動紹興間思
陵極力搜訪僅獲九行百七十六字故米友仁以跋

作九行定為真蹟宋末賈似道執國柄不知何許復
得四行七十四字欲續於後則與九行之跋自相乖
忤故以紹興所得九行裝於前仍依紹興以小璽款
之却以續得四行裝於後以悅生葫蘆印及長字印
款之耳孟頫數年前竊祿翰林因前都下見此神物
託集賢大學士陳公灝委曲購之既而孟頫告歸延
祐庚申忽有僧闖門持陳公書并此卷數千里見遺
云陳公意甚勤勤也陳公誠磊落篤實之士不失信

於一言豈易得也因併及之至治辛酉既裝池適老疾不能跋壬戌閏五月十八日雨後稍涼力疾書於

松雪齋

松雪齋集

又有一本是宣和書譜中所收七璽完然是唐人硬

黃紙所書紙畧高一分來亦同十三行二百五十字

筆畫沈著大之韻勝余屢嘗細觀當是唐人所臨後却有柳公權跋兩行三十二字云子敬好寫洛神賦人間合有數本此其一焉寶曆元年正月廿四日起

居郎柳公權記所以吾不敢以為真蹟者蓋晉唐紙

異亦不可不知也

同上

趙吳興曾得洛神十三行於陳集賢灝自題此晉時
麻牋思陵極力搜訪僅獲九行百七十六字故米友
仁跋作九行宋末賈似道復得四行七十四字欲續
於後則於九行之跋不相屬遂以四行別裝於後以
悅生印及長字印款之今此本不知猶在人間否余
所摹秀州項子京藏是宣和譜中所收吳興云更有

唐人臨本後有柳公權跋亦神物也視世所傳十三

行宋榻何嘗霄壤耶其昌

戲鴻堂法帖

草書洛神賦

此賦草書世傳王大令書然結體殊不類獻之而頗似智永疑其遺跡也至洛神小楷則子敬書無疑矣世以小王好書此賦故凡有洛神書本皆歸之子敬猶東漢諸碑流傳多以為蔡邕書豈盡中郎筆蹟哉

要當鑒以心目而弗信耳傳為佳

東觀餘論

保母帖

右嘉泰癸亥越人掘地得古碑乃晉興三年乙丑歲
王獻之之保母李意如壙志也云善為文能草書王
謝奴碑定小異耳又有小硯背刻王獻之永和五字
二者以致行都別鐫此本四明樓尚書鑰摹以相示
字畫固妙其辭則有望於八百餘年後守官之人自
興寧距今適八百三十餘年預知如此蓋當時卜地
如郭璞輩固不乏也五月二十八日

平園集

保母碑雖近出故是當時所刻較之蘭亭真所謂固
應不同世人知愛蘭亭不知此也丙戌冬伯機得一
本繼之公餘丈得此本令諸人賦詩然後明識中知
有此文丁亥八月僕自燕來還亦得一本又有一詩
僧許僕一本雖未得然已可擬世人若欲學書不可
無此獨恨驅馳南北不得盡古人臨池之工因公餘
出示令人重歎孟頫

書畫題
跋記

撞破烟樓固未然唐摸晉刻絕相懸莫將定武城中

石輕比黃閔墓下磚

姜侯才氣亦人豪
辨析區區漫爾勞
不向驪黃求駟
駿書家自有九方臯

臨摹舊說范新婦
古刻今看李意如
却笑南宮米夫子
一生辛苦學何書

千年鬱鬱閔重泉
漸出還隨劫火烟
靳惜乾坤如有

意流傳今我豈無緣

漁陽鮮于樞
伯機父題

保母帖藏于項氏
鸞羣閣此碑乃獻之
為乳母書手

十
鐫於磚上高尺一寸闊尺五寸餘前有小硯影書類
蘭亭約二百許字磚已裂為二片後有元人題語及
詩數十首茲僅趙吳興鮮于二公所書見世人極重
蘭亭不過歐虞所摹唐工所鐫未若此本大令所自

刻承旨因有固應不同之語玉識

珊瑚網

右王獻之保母帖說者謂勝於定武蘭亭初刻蓋此
帖乃獻之親書於甄而又晉工刻之若蘭亭則馮承
素等鈎摹而又唐工鐫之所以精神氣韻自然不侔

也或者不知猶妄有所疑姜堯章乃作辨評一篇設
為問答援引甚詳博雅君子宜取而覽之正不必求
題識之多也

潛溪集

保母帖辭中令帖大令實為北海之濫觴令人知學
北海而不追踪大令是以佻而無簡直而少致北海
曰似我者俗學我者死不虛也趙吳興猶不免此況

餘子哉

畫禪室
隨筆

十二月帖

晉太宰中書令王獻之字子敬十二月帖黃麻紙辭
云十二月割至否中秋不復不得想未復還慟理為
即甚省如何然勝人何慶等慶等大軍下一印曰鐸
書是唐相王鐸印後有君倩字前有絹小帖是褚遂
良題曰大令十二月帖此帖運筆如火箸畫灰連屬
無端末如不經意所謂一筆書天下子敬第一帖也
元與快雪帖相連蘇太簡家物上有國老才翁子美
題跋云鹵僧守一所藏先令以命服得之子美子激

字志東與余分藏以書畫寶玩易之

米芾
書史

送黎帖

王獻之送黎帖云今送黎三百顆晚雪殊不能佳上有黎幹黎氏印所謂南方君子者跋尾半幅云因太宗書卷首見此兩行十字遂連此卷末若珠還合浦劍入延平太和三年三月十日司封員外郎柳公權記後細題一行曰又一帖十二字連之余辨乃右軍書云思言叙卒何期但有長歎念告公權誤以為子

敬也縫有正觀半印世南孝先字跋孝先是本朝王
曾丞相字劉季孫以一千置得余約以歐陽詢真蹟
二帖王維雪圖六幅正透犀帶一條硯山一枚玉座
珊瑚一枝以易劉見許王銑借余硯山去不即還劉
為澤守行兩日王始見還約再見易而劉死矣其子
以二十千賣與王防唐太宗書竊類子敬公權能於
太宗書卷辨出而復誤連右軍帖為子敬公權知書
者乃如此其跋馮氏西昇經唐經生書也乃謂之褚

書者同也蓋能書者未必能鑒余既跋定之蘇子瞻於是跋詩曰家雞野鷲同登俎春蚓秋蛇總入奩君家兩行十二字氣壓鄴侯三萬籤蓋以晉史太宗贊貶子敬也然唐太宗力學右軍不能至復學虞行書欲上攀右軍故大罵子敬耳子敬天真超逸豈父可

比也

米芾書史

敬美弟自燕中歸得大令此卷後有柳誠懸文與可二跋考誠懸跋蓋併右軍思言叙卒何期但有長嘆

念告十二字俱誤以為大令故有劍合延平珠還合
浦語米元章鑒定之遂析為二卷而子瞻所題家雞
野鷺同登俎春蚓秋蛇總入奩君家兩行十二字氣
壓鄴侯三萬籟蓋右軍思言帖尾也元章左袒大令
故不謂為然而誠懸跋後細題又一帖十二字連之
語皆為元章所削去恐後覽者以誠懸跋語致疑備
記於此若大令筆雖稍有缺軼而存者猶自煜煜射
人眉睫間元章所稱天真爛漫故不虛也誠懸構結

淳古生平鋒鏑歛盡隱然有美牆思吾弟其善有之

弇州

續集

子敬後幾百年而為柳誠懸誠懸又幾百年而為文
與可前者紙渝故當墨敝後者筆近乃宜色鮮然而
墨色濃淡文不及柳柳不及王前後幾如倒置乃知
古今人不相及非獨用筆用墨亦然仲將之墨一點
如漆吾不得而見之矣幸有子敬片楮在持是以觀
凡稱右軍墨蹟墨瀋昏淡者皆偽品也

王世懋
奉常集

授衣帖

右摹本王大令獻之授衣帖一卷七十二行有徐僧
權陳惠辨押尾盖梁御府法書也筆勢閎放實子敬
書之合作者政和二年夏四月洛陽官舍裝

東觀
餘論

辭中令帖

子敬稱州民當是上揚州刺史耳盖會稽王時為揚
州秉政故也書法道逸踈爽然右軍家範不無少變

北海吳興皆其濫觴少可惜耳

弇州山
人藁

大令辭中令帖書家不甚傳或出於米元章黃長睿
之後耳觀其運筆則所謂鳳翥鸞翔似竒反正必非
唐以後諸人所能夢見也李北海似得其意

書畫
眼

中秋帖

米姓晉唐法書真蹟祕玩目有獻之中秋帖趙松雪
以為寶晉刻石即此余因出石刻較之間有不類處
夫形似且失況其精神氣韻欲得之難矣此真蹟所
以可貴而恨世不多見也

勉翁家
藏集

王獻之法帖

右王獻之法帖余嘗喜覽魏晉以來筆墨遺蹟而想前人之高致也所謂法帖者其事率皆弔哀問病叙睽離通訊問施於家人朋友之間不過數行而已蓋其初非用意而逸筆餘興淋漓揮灑或妍或醜百態橫生披卷發函爛然在目使人驟見驚絕徐而視之其意態愈無窮盡故使後世得之以為竒玩而想見其人也至於高文大冊何嘗用此而今人不然至或

棄百事弊精疲力以學書為事業用此終老而窮年

者是誠可笑也治平甲辰秋社日書

六一
題跋

獻之帖蓋唐人所臨其筆法類顏魯公更俟識者辨

之

全
上

王獻之雜帖

子敬書如河間年少自不拘束此當行草中也宋孝
武學書或真行草書雜在一紙或重作數字或學前輩
名人能書者而子敬詩賦贊論亦入此書大似未能得

子敬當處此可與論書法之至耶謝太傅善書不重
子敬每作好書必謂被賞太傅輒題後以答之嘗問
子敬君書何如右軍曰故當勝安曰物論殊不爾子
敬曰世人那得知此帖超軼陵突似欲出其家學宜
諸人有逸氣過父之論也

廣川
書跋

子敬別帖

晁无咎持宗子某所藏子敬三帖使余評之余謂子
敬自少刻意書學似恐墜其家聲中年自造書妙乃

父子名家不能涇渭世人故應異論也謝靈運直謂
當勝右軍唐文皇謂如枯查餓隸不知當時何故立
論如此人之好惡相異有至是耶子敬謂世人那得
知似恐世有妄評者然非筆入三昧豈能於此下轉
語莊子曰自大視細不明自細視大不盡今論中令
父子者皆視大而不盡也

全上

謝太傅悉逸少不取子敬人之好尚各以所見後世
論者便以此為据至過有詆訾豈真知子敬父子間

耶且學本家法以意相授非入其閫域者孰能知之
或為說曰天公問下方人何衣曰衣蠶蠶若何曰喙
頰頰類馬色邠邠類虎天公以為謾使下問還報乃
信西方諸國聞漢人語蠶吐絲而衣亦以為欺也夫
妄言者嘗托於無而人或以為有信言者每託於有
而人或以為無人之誕信相欺何可勝辨耶後人觀
子敬書知其立論者皆蠶說也必有得子敬意者然
後可與辨此李庠示余別帖竊有感焉天下之迷於

是非多矣何可計耶

同上

王中令帖

晉書評子敬書謂筆力遠不及父而有媚趣逸少作
大字壁間子敬墮之而更為明日視之逸少不能辨
也若此則父子間本無分處縱復有異豈應其論至
此也當文皇評書便以子敬無屈伸放縱豈知法度
盡處乃可言筆墨懸解是知曾求于此也晉史修
于唐臣皆貞觀時人其論宜如此

同上

王大令帖

張懷瓘云子敬草書幼師父而後法張芝僕謂獻之
行草亦然模矩雖出於逸少而筆氣飄飄已面元常
庭域矣故自謂與尊故當不同人那得知非夸辭也
觀此帖縱逸若此而唐文皇目以拘孿餓隸無乃大
貶乎政和甲午歲八月十三日夜雲林子黃某觀

東觀

餘論

已復此節帖

右在朝請大夫新昌石元之家關景仁屢見之嘗撫

石某見兩本字札精妙

寶章待訪錄

王子敬帖

告姜秀還二帖及得奈如告至晚或成傷皆子敬書

廣表肥瘦後先不同乃爾豈老稚結字固自異乎抑

具諸家法別作體乎

東觀餘論

袁昂論子敬書以為河朔少年充悅沓拖此書結體

正爾而晉書謂其瘦如隆冬枯木非篤論也此帖摹

傳殊逼真與官帖所錄有間矣

全上

玄度帖

大令之書極易辨大抵無右軍八面變化故其辭多
複間架不茂實所以貴於人間者筆畫勁利態致蕭
疎無一點塵土氣無一分桎梏束縛非勉強仿倣可

以夢見諸如此等皆是其真蹟無疑

墨林
快事

者舊帖

余幼習二王帖見其釋文為柳六惠蓋緣帖中下字

多一帶筆而誤也及得劉氏釋文乃知誤自宋人刊
誤辨正皆不及之則并官帖中亦呼之為六惠矣

林墨

快事

義獻法書

元人一十二跋
當代三公續跋

王右軍東方贊大令洛神賦 後刻普通三年正月

徐僧權等天嘉二年十月廿三日中書舍人朱异

不學蘭亭貯屋梁宓妃曼倩出裝潢王家舊物存義

獻絕勝遺金發窖藏 商丘宋元

晉人真跡千無一真往往皆唐人臨摹唐摹既少米氏所謂石刻高者可降真跡一等此二帖紙墨既佳借觀二日得其妙處 汾亭石巖

右王右軍東方畫贊唐人歐陽率更得其筆法而自成一家者大令洛神賦間以章草柳誠懸嘗謂子敬好寫是賦人間合有數本此其一焉者似不誣矣故鄉先生海粟王君舊有此二帖未及臨池而先生歿其仲子東字起善者得諸故篋即成軸以襲藏是亦

以手澤之氣所存匪特為古人翰墨之重也 蘇人

錢良右敬題

二王翰墨妙絕今古筆法初本鍾元常後世尚王而
少及鍾者亦猶周公孔子尊孔而不及周也友人王
起善一日見示右軍書曼倩畫贊大令書洛神賦是
其尊人海粟公所藏誠先朝故家舊物起善宜珍藏
之母為蕭生所惑也元統乙亥中秋日吳壽民書于
蘓臺寓舍

書法以隸為楷世謂之隸楷漢魏而下鍾元常善隸
書尤工小楷晉王右軍得其法所書樂毅論黃庭經
東方朔畫贊各臻其妙右軍亦自謂他書皆不及之
故其轉折端方一波一拂道勁妍美若雅士立朝垂
紳正服濟濟儀容復如蟬翼鳥翅俱有翩翩自得之
狀大令所書洛神賦非止一本是書多用章草法漢
魏風軌燦然可觀二帖皆石刻中善本況得覩其真
跡者又何如耶 顧復

曼倩儀形漢廟堂
洛神賦韻魏文章
千金石刻人爭
購筆陣猶堪識
二王 弋陽山樵李璣

還四十年前客
丁景仁書館題
此詩白雲師持
以見示頗印疇
昔為之嘆息不
置 漢居

二王筆札為古今
書家宗祖言書
者必稱義獻雖
父子之序當爾
而書之等第亦
錄是而見焉然
子敬嘗自謂書
過其父至觀題
壁乃始心服是
卷以二帖合而
為一豈無意歟
和氏之璧截肪
而凝雪使天地
間

有二馬亦不並色矣 汴段天祐

由籀而篆篆而隸隸而楷楷而至二王蔑以加矣此
東方畫贊洛神賦確乎見重於後世也近攻隸書者
自負軼出江左追踪漢氏凡稍涉永和法者則訾之
曰此晉字也使誠知晉字為六朝唐宋之冠則無是
語惟其未見二王妙處輒於似晉者而輕肆雌黃之
口而于二王其何傷于日月乎王起善家藏二帖雖
是碑刻精神韻度自是絕塵他日有訾晉字或一見

之豈不愧汗浹背乎至元二年丙子歲夏五月八日
天台舒叔獻書

兩帖古意混然與世俗諸本頓異視規規然求其形
似而無神情者相去遠矣蓋學柳下惠者無如魯男
子要當以此評書可以得古人彷彿至正十有八年
秋七月廿六日趙郡蘇大年凝潤軒中題

法書家王右軍畫像贊洛神賦有於莊嚴肅之象今
觀此刻信然而大令以章草法書洛神賦尤為奇偉

王君其寶藏之朱德潤題

谷陽龔先生子敬為僕題唐丁府君墓銘有云祖子
孫一氣雖遠猶親古人所以嚴祭祀之義今觀起善
遠祖右軍大令二帖乃其先子海粟齋所藏手澤存
焉展卷起敬濟陽生丁應榮

書法流傳晉及唐石紋中斷象天潢君家闕古家雞

在松墨精微更世藏 晉賢妙筆陣堂堂鑒賞元暉

繼阿章父子吳興生聖代風流彷彿似諸王 至元

丙子歲暮春重觀起善齋用宋李韻奉題 應榮

二王真蹟宋御府所藏合三百卅餘紙靖康之難悉廢於金人之手矣今或遺逸于世者去晉益遠楮朽墨闇莫辨真贋而卒壽其書流傳天下則幸有石本在耳模刻者之功于是乎可賞若此二帖又二王之名書也然較之世所傳諸帖體格殊異蓋彼皆短牘小簡信筆數行如樂毅論黃庭經與此贊則全篇成章宜其嚴整不苟異於他書而楔飲序出於觴咏游

騁物感興廢之際筆意飄逸又不可執一論若洛神
賦子敬生平所好寫亦用意之書也然自昔人所見
唯自嬉至飛十三行耳此獨得其全文何耶陳味道
先生挾此示予城東之續古堂因嘆二王書如雲行
太虛態度不定觀書者又如魯僖登臺使每歲分至
啟閉皆八表同昏之雲雖不望可也 吳寬題

山谷嘗謂東方畫贊墨蹟疑是吳通微兄弟書以其
遣筆結字極似通微書黃庭外景也又疑洛神賦非

子敬書謂宋宣獻周饒部少加筆力亦可到今觀此
二帖則山谷之論其未然乎必有能辨之者 王鏊
余生平所見方朔先生像贊多矣獨此本最為古搨
而書法迥別蓋北本與南派異也大令洛神賦有楷
書全本有十三行世多翻刻章草小書則僅見此種
而已二帖是吾吳世傳舊物諸跋尤勝自宋迄今最
近者為吳文定王文恪亦垂百年況前此皆宋元有
名人筆乎跋至弋陽李瓚而丁應榮詩尾云用宋李

韻知前此為宋人無疑矣二帖在宋時為人寶重如此又三百年後入余手那得不視為至寶寧但云下真蹟一等而已嘉靖中吳刻二王帖選中洛神賦從此本翻出者徒具形似觀此便當燒却萬曆丁卯夏六月世懋謹識

再閱所謂宋李乃宋元李瓚二人非謂宋時人也然觀瓚再題云此十年前客丁景仁書館題則前題時亦當是宋末矣豈此帖在宋時歸丁應榮後歸王海

粟而應榮復為之跋耶不然海粟父子實是帖已歷

宋元二代耶戊子春正月世懋又題

珊瑚網

六藝之一錄卷一百六十三